



Hybu Cig Cymru

Ymateb i Adroddiad Pwyllgor yr
Economi, Masnach a Materion
Gwledig

(Hydref 2025)

15/10/2025

Cynnwys

1.	Cyflwyniad	2
2.	Ymatebion i'r 9 argymhelliad	2
i.	Argymhelliad 1	2
ii.	Argymhelliad 2	3
iii.	Argymhelliad 3	3
iv.	Argymhelliad 4	4
v.	Argymhelliad 5	5
vi.	Argymhelliad 6	5
vii.	Argymhelliad 7	6
viii.	Argymhelliad 8	7
ix.	Argymhelliad 9	8

1. Cyflwyniad

Ar 3 Medi 2025, cyflwynodd Pwyllgor yr Economi, Masnach a Materion Gwledig ei adroddiad ar Hybu Cig Cymru (HCC) a diolchaf i'r pwyllgor am gynnal yr ymchwiliad hwn.

Mae'r adroddiad yn cynnwys 9 argymhelliad, a dyma ymateb Llywodraeth Cymru i'r argymhellion hynny.

Huw Irranca-Davies AS/MS

Dirprwy Brif Weinidog ac Ysgrifennydd y Cabinet dros Newid Hinsawdd a Materion Gwledig

2. Ymatebion i'r 9 argymhelliad

Argymhelliad 1

Dylai Llywodraeth Cymru adolygu llywodraethiant HCC gyda'r nod o wella cynrychiolaeth safbwyntiau'r rhai sy'n talu'r ardoll a chynyddu cyfraniad ehangach y diwydiant o fewn y sefydliad. Fel rhan o'r adolygiad hwn dylai ystyried pob opsiwn, o gadw swyddi penodol ar y bwrdd ar gyfer y rhai sy'n talu'r ardoll a'r diwydiant ehangach, i ddychwelyd perchnogaeth lawn o'r sefydliad i ddwylo talwyr yr ardoll.

Ymateb Llywodraeth Cymru: Gwrthod

Mae Llywodraeth Cymru a Hybu Cig Cymru (HCC) yn cydnabod pwysigrwydd sicrhau bod strwythurau llywodraethu HCC yn adlewyrchu barn a buddiannau talwyr yr ardoll a'r diwydiant ehangach. Gyda phump o un ar ddeg o aelodau'r bwrdd, gan gynnwys y Cadeirydd, yn talu'r ardoll, mae'r cyfraniad a wneir gan ein penodiadau cyhoeddus yn hanfodol i sicrhau bod y bwrdd yn gwella'n barhaus, yn angerddol dros y sector amaeth ac yn ymrwymo i hyrwyddo, datblygu a marchnata cig coch o Gymru yng Nghymru.

Mae bwrdd presennol HCC yn cynnwys aelodau hefyd ag ystod eang o sgiliau a phersbectifau allanol. Mae aelodau'r bwrdd yn dod ag arbenigedd angenrheidiol mewn meysydd fel cyfnewid gwybodaeth, llywodraethu, marchnata, cyllid, iechyd anifeiliaid, ymchwil a chynaliadwyedd amgylcheddol. Bydd fy swyddogion yn fy nghynghori cyn hir ar yr opsiynau ailbenodi a/neu recriwtio ar gyfer yr aelodau hynny o'r bwrdd y mae eu tymhorau yn dod i ben ym mis Mawrth 2026. Byddaf yn ystyried argymhelliad y Pwyllgor a byddaf yn parhau i sicrhau bod set sgiliau amrywiol ac yn parhau i ddarparu bwrdd cadarn ac amrywiol.

Mae'r Prif Weithredwr newydd wedi bod yn ei swydd ers mis Ionawr 2025. Mae cynnal adolygiad helaeth (fel yr argymhellir gan y Pwyllgor), tra bod gwaith sylweddol ar y Weledigaeth yn mynd rhagddo, yn dasg hirdymor y dylai'r Llywodraeth nesaf ei hystyried unwaith y bydd y Weledigaeth wedi'i chwblhau a bod y Prif Weithredwr wedi cael digon o amser i gynnal unrhyw newidiadau angenrheidiol.

Goblygiadau Ariannol - Dim

Argymhelliad 2

Mae'r pwyllgor yn cefnogi'n llwyr y defnydd parhaus o'r ardoll statudol fel dull o ariannu HCC, fodd bynnag, roedd y dystiolaeth a gafwyd, gan gynnwys gan HCC, yn glir nad yw incwm gan yr ardoll yn unig yn ddigonol i gwmpasu cylch gwaith a llwyth gwaith presennol y sefydliad. Dylai Llywodraeth Cymru nodi sut y mae'n bwriadu parhau i ariannu HCC neu sut y mae'n disgwyl i HCC barhau i weithredu'n ariannol

Argymhelliad 3

Mae'n amlwg, er mwyn i HCC gyflawni ei fandad helaeth, y bydd angen cyllid ychwanegol. Dylai Llywodraeth Cymru a HCC archwilio pob ffordd bosibl i gynyddu cyllideb HCC, gan gynnwys nodi gwaith y gallai HCC ei wneud i ategu polisiau eraill Llywodraeth Cymru a sicrhau cefnogaeth ariannol gan Lywodraeth Cymru ar gyfer mentrau o'r fath. Ar ben hynny, dylai nodi ffynonellau ariannu eraill y gallai HCC wneud cais amdanynt, gan gynnwys grantiau, ac o bosibl darparu gwasanaethau i sefydliadau eraill. Fodd bynnag, rhaid i unrhyw gynnydd mewn cyllid ar gyfer HCC ddod law yn llaw â mesurau atebolrwydd a pherfformiad gwell.

Ymateb Llywodraeth Cymru i argymhelliad 2 a 3:

Derbyn: Mewn egwyddor

Mae Llywodraeth Cymru yn cydnabod bod sefyllfa ariannol HCC yn anodd am sawl rheswm, gan gynnwys oherwydd gostyngiad yn incwm yr ardoll cig coch. Mae'n edrych ymlaen at weithio gyda HCC wrth iddo ddatblygu ei flaenoriaethau drwy'r Weledigaeth ar gyfer 2026 i 2030.

Rydym wedi ymrwymo i sector amaethyddol cynaliadwy, bywiog a llwyddiannus a chadwyn fwyd sy'n helpu i greu sail i'r economi wledig ehangach. Mae angen i ni roi'r gefnogaeth gywir i'n ffermwyr drwy gydol y cyfnod pontio i system fwyd ddi-garbon a sicrhau bod tir Cymru yn ateb gofyn y dyfodol.

Mae cyflwyno'r Cynllun Ffermio Cynaliadwy (SFS) yn rhoi cyfle i weithio gyda thrawstoriad o sefydliadau i ddarparu ymchwil bwrpasol ac atebion arloesol ac ati i ffermwyr. Mae HCC yn rhan annatod o'r broses honno, a byddwn yn gweithio ar y cyd i sicrhau bod yr SFS a Gweledigaeth HCC ar gyfer 2026 yn cael eu halinio. Unwaith y caiff y gwaith hwn ei wneud, byddwn yn diweddarau'r Pwyllgor.

Mae HCC bellach wedi gwneud cais am Fframwaith Prynu Dynamig Llywodraeth Cymru a allai rhoi cyfleoedd ariannu amgen iddynt yn y dyfodol. Bydd unrhyw gyllid y gall HCC ei gael yn y dyfodol drwy'r Fframwaith Prynu Deinamig yn gorfod cael ei lywodraethu a'i fonitro yn unol â rheolau caffael Llywodraeth Cymru.

Goblygiadau Ariannol – mae'r gwaith hwn yn mynd rhagddo a daw o dan gyllidebau presennol.

Argymhelliad 4

Er mwyn cefnogi gwaith cynllunio busnes ffermwyr a phroseswyr, dylai Llywodraeth Cymru egluro ei safbwynt ar niferoedd da byw yn y dyfodol. Os bydd Llywodraeth Cymru yn penderfynu cefnogi gostyngiad mewn niferoedd da byw, dylai nodi'r effaith ddisgwyliedig ar y diwydiant prosesu a darparu unrhyw gymorth y gallai fod ei angen

Ymateb Llywodraeth Cymru: Derbynn

Mae Llywodraeth Cymru yn cydnabod bod cyflenwad sefydlog a digonol o dda byw yn hanfodol i hyfywedd y sectorau prosesu cig coch a llaeth yng Nghymru. Datgelodd Arolwg Amaethyddol a Garddwriaethol Mehefin 2024 y bu newidiadau mawr yn ddiweddar yn niferoedd da byw Cymru, gyda gostyngiad mewn gwartheg, defaid a moch, ond cynnydd mewn dofednod. Mae'r tueddiadau hyn yn arwyddocaol yng nghyd-destun y nodau newid hinsawdd a rhagolygon poblogaethau da byw yn y dyfodol.

Yn ei gyngor diweddaraf i Gymru, mae Pwyllgor Newid Hinsawdd y DU (UKCCC, cynghorydd statudol Llywodraeth Cymru ar hinsawdd) yn argymhell gostyngiad o 19% yn nifer y da byw cnoi cil erbyn 2033 (yn enwedig gwartheg a defaid), er mwyn lleihau allyriadau methan, sy'n cyfrannu'n fawr at y nwyon tŷ gwydr amaethyddol. Mae'r gostyngiadau a awgrymir gan UKCCC yn rhan o Lwybr Cytbwys ar gyfer yr economi gyfan. Yn eu barn nhw, mae hon yn ffordd gost-effeithiol sy'n cydbwysu'r angen i ddatgarboneiddio ym mhob sector o'n heconomi i raddau gwahanol. Wrth lunio'r argymhelliad, mae'r UKCCC yn defnyddio llinell sylfaen sy'n dechrau yn 2025, lle amcangyfrifir bod 10,9 miliwn o wartheg a defaid, a fydd yn gostwng i 9.7 miliwn yn 2030. Dywedant y caiff y gostyngiad hwn ei yrru i raddau helaeth gan rymoedd y farchnad.

Mae ystadegau diweddaraf Arolwg Mehefin ar gyfer 2024 yn cadarnhau bod niferoedd da byw yng Nghymru eisoes yn is nag amcangyfrif UKCCC ar gyfer 2025. Yn wir, mae niferoedd da byw yn 2024 bron ar y lefel a awgrymwyd gan UKCCC ar gyfer 2030 o fewn eu Lwybr Cytbwys. Bydd Llywodraeth Cymru yn parhau i fonitro'r arolwg mis Mehefin nesaf yn 2025 (a gaiff ei gyhoeddi ym mis Tachwedd 2025) a hefyd gyda'r Llywodraethau eraill drwy Grŵp Monitro Marchnad y DU.

Mae'r Cynllun Ffermio Cynaliadwy (SFS) wedi'i gynllunio i ysgogi cynhyrchu cyfrifol, sydd yn ei dro yn cefnogi'r gadwyn gyflenwi i fodloni safonau cynaliadwyedd. Nod yr SFS yw cefnogi Amaethyddiaeth Cymru i ddilyn arferion mwy cynaliadwy. Mae hyn yn cynnwys cynhyrchu da byw.

Goblygiadau Ariannol - Dim

Argymhelliad 5

Dylai HCC gyflwyno adroddiadau rheolaidd i Lywodraeth Cymru yn amlinellu cynnydd ar greu a chynnal diwylliant corfforaethol iach am y tair blynedd nesaf. Dylai Llywodraeth Cymru barhau i fonitro'r diwylliant yn HCC a rhoi gwybod i'r Pwyllgor hwn a'i olynydd yn y Senedd nesaf am gynnydd HCC yn y maes hwn.

Ymateb Llywodraeth Cymru: Derbyn

Mae diwylliant corfforaethol iach yn hanfodol ar gyfer llwyddiant unrhyw sefydliad. Mae'n ennyn diddordeb, ac yn sbarduno cynhyrchiant, hapusrwydd a thwf refeniw. Mae HCC yn cynnal sawl menter i wella lles gweithwyr.

Cynhelir cyfarfodydd gweinidogol yn rheolaidd gyda Chadeirydd a Phrif Weithredwr HCC i drafod ystod eang o bynciau, gan gynnwys diwylliant sefydliadol. Byddwn yn sicrhau bod 'diwylliant corfforaethol' yn eitem sefydlog ar agenda yn y cyfarfodydd Llywodraethu chwarterol, y gallir ei fonitro'n briodol.

Goblygiadau Ariannol – Dim

Argymhelliad 6

Mae gan HCC gylch gwaith eang iawn, fodd bynnag, mae'r Pwyllgor yn credu bod yn rhaid i HCC gyfeirio ei waith i gyd-fynd â'i gyllideb lai. Er mwyn cyflawni hyn, dylai Llywodraeth Cymru gytuno ar Ddangosyddion Perfformiad Allweddol newydd, mesuradwy a thryloyw gyda HCC. Dylai Llywodraeth Cymru fesur cynnydd yn erbyn y Dangosyddion Perfformiad Allweddol hyn yn rheolaidd, a dylai canlyniad yr adolygiad hwnnw gael ei gyhoeddi mewn modd sy'n glir ac yn dryloyw i dalwyr yr ardoll a rhanddeiliaid eraill. Dylai'r Dangosyddion Perfformiad Allweddol newydd gynnwys dangosyddion sy'n:

- Gosod disgwyliadau clir ynghylch ymgysylltu â rhanddeiliaid a thalwyr yr ardoll gan gynnwys cwrdd â thalwyr yr ardoll lle y maent a sicrhau gwelededd clir a hygyrchedd staff HCC gan gynnwys uwch arweinwyr;
- Sicrhau y gwerth gorau i dalwyr yr ardoll ac unrhyw arian cyhoeddus ychwanegol efallai y bydd HCC yn ei gael; a
- Sicrhau canlyniadau cryf o weithgareddau hyrwyddo sy'n cael eu mesur mewn ffordd glir ac agored.

Ymateb Llywodraeth Cymru: Derbyn

Mae Llywodraeth Cymru yn parhau i gefnogi HCC i sicrhau ei fod yn parhau i wneud ei waith pwysig dros y sector cig coch yng Nghymru.

Mae Llywodraeth Cymru, drwy Aelodau ei Bwrdd, yn monitro dangosyddion perfformiad allweddol HCC yn rheolaidd o ran cyflawni a hefyd drwy'r cyfarfodydd Llywodraethu chwarterol. Mae'r cyfarfodydd hyn yn rhoi cyfle ffurfiol i rannu gwybodaeth a sicrhau bod gwaith HCC yn cael ei fonitro a'i wneud yn effeithiol er

mwyn i HCC allu canolbwyntio'n gadarn ar roi gwerth eu harian i dalwyr ardollau ac ar hyrwyddo ein diwydiant cig coch.

Byddwn yn gweithio'n agos gyda HCC i ddatblygu ei Weledigaeth ar gyfer 2026-2030. Ar y cyd â'r Weledigaeth, byddwn hefyd yn parhau i ddatblygu'r cynllun busnes o fewn y fframwaith polisi a osodwyd gan Lywodraeth Cymru i gwmpasu cyfnod yr agenda strategol.

Bydd hyn yn cynnwys cytuno ar gynllun gweithredol blynyddol a fydd yn egluro lefel y gwasanaeth sydd i'w gyrraedd mewn meysydd allweddol a'r wybodaeth am berfformiad ac allbynnau a gaiff eu casglu i fonitro cynnydd. Bydd Llywodraeth Cymru yn adolygu'r Dangosyddion Perfformiad Allweddol i sicrhau eu bod yn gyraeddadwy, yn amserol, yn fesuradwy, yn benodol, yn uchelgeisiol ac yn synhwyrol (CAMPUS).

Goblygiadau Ariannol - Dim

Argymhelliad 7

Dylai Llywodraeth Cymru gynnal adolygiad i nodi meysydd lle gallai HCC gynyddu cydweithio a/neu rannu adnoddau gyda byrddau ardoll eraill a sefydliadau datganoledig perthnasol eraill fel Cyswllt Ffermio. Dylai hyn gynnwys chwilio am feysydd lle gallant leihau dyblygu ymdrechion a manteisio ar arbedion maint posibl. Diben yr adolygiad hwn ddylai fod nodi meysydd lle gellid gwneud arbedion y gellir eu hailfuddsoddi ym musnes craidd HCC o hyrwyddo cig Cymru a datblygu'r sector cig coch. Ni ddylai'r adolygiad hwn fod yn gyfyngedig o ran cwmplas a rhaid iddo ymestyn y tu hwnt i rannu gwybodaeth syml i agweddau fel caffael ar y cyd a rhannu swyddogaethau swyddfa gefn.

Ymateb Llywodraeth Cymru: Gwrthod

HCC a chyrrff Ardoll eraill

Mae HCC wedi meithrin perthynas ardderchog â'r byrddau ardoll eraill a thrwy barhau i gydweithio byddan nhw'n parhau i weithio gyda'i gilydd i ddwysáu gweithgarwch lle bo hynny'n berthnasol a chael mynediad at gyllid i sefydlu rhaglenni sy'n rhoi'r gwerth mwyaf am arian, hynny er lles y gadwyn gyflenwi gyfan.

Mae'r llythyr atodol a anfonwyd at Bwyllgor ETRA ar 30 Mai 2025, yn rhestru'r holl weithgareddau a phrosiectau cydweithredol rhwng y cyrrff ardoll.

Cyswllt Ffermio

Mae cyflenwyr Cyswllt Ffermio wedi sefydlu partneriaethau effeithiol gyda HCC ar draws nifer o gontractau, gyda HCC yn cyflenwi gwybodaeth am y farchnad a Cyswllt Ffermio yn datblygu ymyriadau wedi'u targedu i alluogi cynhyrchwyr i fodloni gofynion proseswyr.

Ar hyn o bryd mae Llywodraeth Cymru yn caffael contract Cyswllt Ffermio newydd, a fydd yn dechrau ar 1 Ebrill 2026.

Yn ôl y fanyleb gaffael ddiweddaraf, mae'n ofynnol bod pob digwyddiad a menter yn ategu'r gweithgareddau a ddarperir gan Lywodraeth Cymru, ei chyrrff nodedig, cyrff ardoll, a sefydliadau eraill y sector. Bydd angen tystiolaeth o sut y bydd hyn yn cael ei wneud fel rhan o unrhyw gynnig gan ddarpar gyflenwyr. Bydd disgwyl i'r ceisydd llwyddiannus sefydlu protocolau gweithio gyda'r grwpiau hyn i osgoi dyblygu o fewn unrhyw agwedd ar gyflenwi cyn i'r contract newydd ddechrau. Mae ceisio am y contract yn benderfyniad masnachol i sefydliadau, gan gynnwys HCC, ac efallai y bydd rhai yn dewis cydweithio fel consortiwm i sicrhau'r effeithlonrwydd gorau.

Nid yw'n briodol cynnal adolygiad yn ystod y broses gaffael sy'n mynd rhagddi ar hyn o bryd a byddai'n well ei wneud yn amcan tymor hwy.

Goblygiadau Ariannol – Dim

Argymhelliad 8

Rhaid i HCC sicrhau ei fod yn mesur effaith gweithgareddau hyrwyddo drwy ddata pendant a chymaradwy a fydd yn dangos canlyniadau nid gweithgareddau yn unig. Un opsiwn i gyflawni hyn fyddai adeiladu ar y gwaith y mae wedi'i wneud gyda manwerthwyr ar ddefnyddio data cardiau teyrngarwch i ddeall effaith uniongyrchol ei waith. Dylid cyfleu manylion y mesuriad hwn a'r canlyniadau mewn modd clir ac agored i dalwyr yr ardoll.

Ymateb Llywodraeth Cymru: Derbyn

Mae'r argymhelliad hwn wedi'i anelu'n benodol at HCC yn hytrach na Llywodraeth Cymru. Fodd bynnag, rydym yn cydnabod bod ymgyrch integredig Cig Oen 2024-25 yn cyfuno cyfryngau teledu, digidol, cymdeithasol, y wasg a'r cyfryngau yn y siop i hybu ymwybyddiaeth o'r brand a gwerthiant, gan dargedu 62 o siopau yng Nghymru a De-ddwyrain Lloegr. Defnyddiodd yr ymgyrch offer mesur cadarn gan gynnwys arolygon YouGov Direct, astudiaeth codi brand Sky, a data gwerthiant Nectar360 i asesu ei effaith.

- **Defnydd integredig aml-sianel:** Gwnaeth yr ymgyrch gydweithio â Sky a Nectar360, gan ganolbwyntio ar 62 o siopau i gyd-fynd â chynnyrch Sainsbury's Taste the Difference, gan dargedu cwsmeriaid cig oen a phrynwyr cig gyda negeseuon wedi'u teilwra i ennyn cymaint o ddiddordeb â phosibl.
- **Mesuriadau cadarn a mewnwelediadau:** Olrhain effeithiolrwydd yr ymgyrch trwy banel YouGov o 3,000 o bobl ac astudiaeth codi brand Sky, gyda Nectar360 yn darparu data gwerthu newydd ar ôl yr ymgyrch, gan alluogi dadansoddiad manwl o ymddygiad defnyddwyr.
- **Twf sylweddol yn y gwerthiant:** Cynyddodd gwerthiant Cig Oen Cymru yng Nghymru 24% bob blwyddyn ar gyfer Medi a Hydref, gyda chyfanswm gwerthiant cig oen yn cynyddu 70% a 101%, tra gwelwyd cynnydd o 21% yn y siopau yn Lloegr gafodd eu targedu, gan ddangos ffrwyth cefnogaeth lwyddiannus mewn siopau.

- **Canfyddiadau defnyddwyr yn gwella:** Yng Nghymru, cododd ymwybyddiaeth o'r brand i 93%, gyda chynnydd mewn canfyddiadau ynghylch ansawdd, blas, iechyd a chynaliadwyedd; Gwelwyd twf mewn ymwybyddiaeth yn Lloegr hefyd gyda mwy yn prynu er gwaethaf llai yn adnabod y logo a llai o ganfyddiad am gynaliadwyedd.

Dros ymgyrch 2025-26 mae HCC yn adeiladu ar lwyddiant blaenorol. Mae ymgyrch integredig 2025-26 i godi ymwybyddiaeth defnyddwyr yn cynnal yr amcanion presennol wrth barhau â phartneriaethau gyda Sky a Nectar360. Mae ychwanegiad newydd – AdMaxim – yn galluogi olrhain camau pobl yn fanwl gywir i siopau sy'n gwerthu Cig Oen Cymru, gan gryfhau cydweithrediad rhwng manwerthwyr a datgloi gwybodaeth ddyfnach.

Mae'r gwerthusiad eleni yn adlewyrchu methodoleg flaenorol, gan alluogi cymariaethau ystyrlon o flwyddyn i flwyddyn. Erbyn diwedd yr ymgyrch, bydd data yn cynnwys tair blynedd o dracio'r brand trwy Sky, chwe blynedd o ddadansoddiadau am y brand, a dwy flynedd o ddata gwerthiant gyda manwerthwr penodol - gan ffurfio sylfaen gref ar gyfer dadansoddi strategol hirdymor.

Goblygiadau Ariannol - Dim

Argymhelliaid 9

Rhaid i Lywodraeth Cymru a HCC sicrhau bod lleisiau'r diwydiant yn cael eu cynrychioli'n dda yn eu gwaith i ddiweddarau Cytundeb Fframwaith HCC. Er mwyn cyflawni hyn, rhaid i Lywodraeth Cymru ymgynghori â'r diwydiant 'lle y maent' i sicrhau ei bod yn clywed pob llais, nid dim ond y rhai sydd â'r amser a'r gallu i ymgysylltu'n hawdd â Llywodraeth Cymru

Ymateb Llywodraeth Cymru: Gwrthod

Mae gan HCC a Llywodraeth Cymru ddealltwriaeth glir o'u cyfrifoldebau a'u cyfrifoldebau drwy'r Cytundeb Dirprwy.

Mae'r Cytundeb Fframwaith yn drefniant mewnol rhwng Gweinidogion Cymru a HCC sy'n nodi'r fframwaith cyffredinol y mae HCC yn gweithredu ynddo, yn disgrifio o dan ba delerau ac amodau y caiff Gweinidogion Cymru ddarparu adnoddau i'r HCC ac yn diffinio rolau a chyfrifoldebau Gweinidogion Cymru a HCC a'r berthynas rhyngddynt.

Mae'r Cytundeb Fframwaith a gyhoeddwyd ac y cytunwyd arno'n ddiweddar yn rhoi mwy o eglurder i rolau a chyfrifoldebau, yn benodol rhai Gweinidogion, Cadeirydd y bwrdd ac Aelodau'r bwrdd, y swyddog cyfrifyddu, y tîm Nawdd a'r Uned Cyrff Cyhoeddus.

Mae Gweledigaeth a Chyfeiriad Strategol presennol Sector Cig Coch Cymru yn dod i ben yn 2025. Mae HCC yn cychwyn datblygu Gweledigaeth newydd, a fydd yn arwain y sector o 2026 hyd at 2030.

Ers penodi Prif Weithredwr newydd ym mis Ionawr 2025, mae cydweithio â'r diwydiant wedi bod yn brif flaenoriaeth. Mae hyn yn ychwanegol at y gwaith ymgysylltu sy'n cael ei wneud bob wythnos gan y sefydliad trwy sawl sianel sy'n

eiddo iddo, a rennir ganddo ac y telir amdanynt ganddo.

Cafodd yr ymgysylltiad gwell hwn ei ddatblygu fel rhan o ymgyrch ragweithiol sy'n canolbwyntio ar strategaeth y diwydiant yn y dyfodol (Gweledigaeth 2030). Dyma ei brif uchafbwyntiau:

- Cyfarfodydd un-i-un gyda sefydliadau rhanddeiliaid allweddol, gan gynnwys undebau ffermio, proseswyr a sefydliadau ehangach
- Presenoldeb HCC ledled Cymru mewn marchnadoedd da byw (cyfanswm o 16) i ymgysylltu'n uniongyrchol â thalwyr yr ardoll er mwyn cefnogi'r gwaith o ddatblygu strategaeth HCC yn y dyfodol.
- 'Arolwg' ehangach o dalwyr yr ardoll fis Mai – Gorffennaf 2025
- 'Cais am farn' gan sefydliadau rhanddeiliaid a'r diwydiant ac yn ehangach am strategaeth ac anghenion y diwydiant yn y dyfodol.
- Cryfhau presenoldeb a rhyngweithio yn Sioe Frenhinol Cymru 2025 gyda phwyslais arbennig ar gasglu barn ar gyfer Gweledigaeth 2030.
- Bydd ymgysylltu gwell yn parhau dros 2025-26 wrth i HCC geisio cwblhau Gweledigaeth 2030. Ar ôl ei chwblhau, mae HCC am gynnal ymgyrch gyfathrebu integredig i lywio, fel partneriaid, y diwydiant wrth ei rhoi ar waith o fis Ebrill 2026 ymlaen.

Goblygiadau Ariannol - Dim